



საქართველოს ადვოკატთა ასოციაციის ეთიკის კომისიის N001/21¹ რეკომენდაციის მოკლე მიმოხილვა

გია ჩხაიძე (სტუდენტი)

შეკითხვა

ფიზიკურ პირს (შემდგომში - „კლიენტი“) გადაწყვეტილი აქვს ადვოკატს, რომელთანაც იმყოფება ხანგრძლივ პროფესიულ ურთიერთობაში და ამასთან აქვს მის მიმართ მაღალი ნდობა, მიანდოს გარკვეული ფულადი სახსრები კონკრეტული დანიშნულებით. კერძოდ, კლიენტი არის მძიმედ ავად და აგრეთვე, აქვს პრობლემები სამართალდამცავ ორგანოებთან. ამდენად, იმ შემთხვევაში თუ კლიენტი გარდაიცვლება ან მოუწევს იძულებით ქვეყნის დატოვება, ადვოკატმა მინდობილი ფულადი სახსრები უნდა გადასცეს მის მეუღლეს. კლიენტს აინტერესებს, შეიძლება თუ არა ადვოკატმა აპეკ-ის 8.13 მუხლისა და ადვოკატთა შესახებ საქართველოს კანონიდან გამომდინარე დადოს მასთან მინდობისა და დავალების ხელშეკრულება?

სამართლებრივი შეფასება

კლიენტის მიერ ადვოკატისათვის ფულადი სახსრების მიბარება არ წარმოადგენს ტრადიციულ საადვოკატო საქმიანობას, როგორც არის წარმოდგენილი განხორციელება და იურიდიული რჩევის მიცემა. თუმცა, რადგანაც უკვე ჩამოყალიბებულია ადვოკატ-კლიენტის ურთიერთობა, კლიენტის მხრიდან ქონების მინდობა აპეკ-ის 8.13 მუხლით რეგულირებას ექვემდებარება. ამრიგად, ადვოკატის ვალდებულებაა კლიენტისგან მინდობილი ფულადი სახსრები შეინახოს თავისი ქონებისგან განცალკევებით და კეთილსინდისიერად მართოს ის, რაც მოიცავს მათი უსაფრთხოდ შენახვის ვალდებულებას, მაგ. ბანკში. საქართველოს ეროვნული ბანკის რეგულაციის შესაბამისად, ადვოკატებს აქვთ ნომინალური მფლობელობის ერთობლივი ან სეგრეგირებული საბანკო ანგარიშის გახსნის უფლება. შედეგად, მინდობილი სახსრები უნდა განთავსდეს სეგრეგირებულ ნომინალური მფლობელობის ანგარიშზე, რაც მოიცავს უფლებას კლიენტისათვის მოთხოვნისამებრ ანგარიშგების მიწოდებას. ნიშანდობლივია, რომ კლიენტის თანხების მიღების ან და განკარგვისათვის სპეციალური წესების არსებობა მნიშვნელოვანია სწორედ მისი კეთილსინდისიერად მართვის უზრუნველსაყოფად.

ადვოკატის მიერ კლიენტისგან მინდობილი ფულადი სახსრების განკარგვისთვის კლიენტისგან მიღებული მითითებები ექვემდებარება კანონიერების პრინციპს. ადვოკატთა შესახებ საქართველოს კანონის მე-3 მუხლის თანახმად, საადვოკატო საქმიანობის პირველი პრინციპია კანონიერება. შესაბამისად, ადვოკატმა არ უნდა მიიღოს მითითება, რომელიც ეწინააღმდეგება კანონს. კლიენტის სიცოცხლეში მისი მითითებით, ადვოკატს შეუძლია მინდობილი ფულადი სახსრები გადასცეს მის მეუღლეს ან ნებისმიერ სხვა პირს. კლიენტის გარდაცვალების შემთხვევაში, ადვოკატ-კლიენტის ურთიერთობა წყდება და ადვოკატზე გაცემული მინდობილობა საქართველოს სამოქალაქო კოდექსის 10(დ) მუხლის შესაბამისად უქმდება. შედეგად, ადვოკატი ვალდებულია მინდობილი ფულადი სახსრები გადასცეს არა კონკრეტულ პირს, არამედ სამკვიდროს მმართველს ან განკარგოს ისინი სამკვიდრო მოწმობის შესაბამისად. კლიენტის მითითება, რომ მისი გარდაცვალების შემთხვევაში, ადვოკატმა მინდობილო თანხები კლიენტის მეუღლეს უნდა გადასცეს, საქართველოში მოქმედ სამკვიდრო სამართალთან შეუსაბამოა.

სადავოობის თავიდან ასაცილებლად, რეკომენდებულია ადვოკატმა კლიენტის მითითებები გააფორმოს წერილობითი სახით. აგრეთვე, ადვოკატმა საადვოკატო საქმიანობასთან დაუკავშირებელი ქონების მინდობით მიღებისას უნდა გაითვალისწინოს შესაძლო ინტერესთა

¹ <https://gba.ge/pdf/60910a681de5f.pdf/werilobiti%20rekomendacia%2000121.pdf>

კონფლიქტის არსებობის საშიშროება. იმ შემთხვევაში, თუ ადვოკატს არ აქვს ინტერესთა კონფლიქტი, მაშინ მას შეუძლია შენახვის მიზნით მიიღოს კლიენტის ქონება და მისი კანონთა შესაბამისი მითითებებით განკარგოს ის. სხვა შემთხვევაში, ადვოკატს შეუძლია კლიენტს ურჩიოს სხვა პირის მომსახურებით სარგებლობა, მათ შორის ნოტარიუსით, რომელიც კანონის საფუძველზე ახორციელებს ქონების დეკონირებას.

დასკვნა

თუ კლიენტი შესთავაზებს ადვოკატს ფულად სახსრების მინდობას, პირველ რიგში, ადვოკატმა უნდა შეამოწმოს ხომ არ აქვს მას ინტერესთა კონფლიქტი მის დამატებით როლთან ან სახსრების ბენეფიციართან დაკავშირებით. ამასთან ერთად, ადვოკატმა უნდა შეამოწმოს, შესაბამისობაშია თუ არა კლიენტის მითითება კანონთან. კლიენტის გარდაცვალების შემთხვევაში, ადვოკატის მიერ კლიენტის მეუღლის ან რომელიმე კონკრეტული პირისათვის მინდობილი თანხების გადაცემა იქნება კანონსაწინააღმდეგო. ადვოკატმა ასეთ დროს, კლიენტის ქონება უნდა გადასცეს სამკვიდრო მმართველს ან იმოქმედოს სამკვიდრო მოწმობის შესაბამისად. თუ კონფლიქტი არ არსებობს და მითითება შესაბამისობაშია კანონთან, ადვოკატს შეუძლია მინდობილი პირის ფუნქციის შესრულება, მათ შორის კლიენტის სიცოცხლეში ქონების ნებისმიერი პირისთვის გადაცემა, შესაბამისი წინაპირობების დადგომის სარწმუნოდ შეტყობის შემთხვევაში.